

四庫全書

史部

欽定四庫全書

史部

廣東通志卷六十三

四

詳校官監察御史臣龔驂文

檢討臣德生覆勘

總校官檢討臣何思鈞

校對官中書臣王鍾泰

謄錄監生臣畢所當

欽定四庫全書

廣東通志卷六十三

藝文志

五

詩集

國朝

遊白雲山

方粲叔

丁未日已長五月正初吉悠然想白雲策杖離蓬華佳
氣鬱葱蔥真見卿與霽草木各欣榮翠岫亦蒼鬱已無

遊女譌不聞采薇逸澗畔有餘蒲林際閒僧出源泉百
尺飛鍾乳雲外溢仙子去應還故山留石室我為太平
人名勝日梳櫛

遊七星巖

王隼

平原澹朝暉策馬郭北路輕雲停高峰明滅寒烟樹入
林逢老僧指我巖中去盤曲若覆盂石齒如垂縷鳥道
緣秋毫歎空無尺土造物秘青冥日月未到處把燭連
袂行陰風吹石乳幽谷隱淪棲雲竇精靈聚人生百年

內罕值山川趣既愜探幽情復遇賞心侶但值唐虞時
終慙澤豹霧

寓白鶴峰蘇文忠故居追和原韻

張尚瑗

洪波涌噴岼其陰城所麗邈迤萬家烟俯矚毫末細環
山蒙絡之勢欲挾俱逝倏忽風雨來危闌不可憇旅懷
困蒸暑息肩良得計肅瞻大蘇像捫衣拜階砌循州文
字祖蠻風變椎髻飽飯和陶詩一切看委蛻眇末敢希

蹤竭來饜新荔緬維天人姿謫降偶塵世騎麟遊大荒
鳴鶴矯空際愈愧休明時竟無鼓吹製

大庾嶺

王士禎

五嶺界百粵東嶠實大庾西衡北豫章嵯峨此終古黃
屋敢自娛僭僞緣秦楚魑結慕漢德再世除險阻六代
及五季紛紜不足數昨者滇閩亂此嶺煩師旅我來兵
銷後叢薄無豺虎絕頂眺南溟波濤如可覩白雲左右
飛危徑穿一縷回首望中原佳氣溢橫浦

韶石

王士禎

昔聞韶石奇，今覩韶石狀。奇峰削凡體，斗絕各雄長。怪石走中流，牙角怒相向。峽逼春湍豪，撞春力頗抗。雙闕屹東西，毬門始誰創。其旁有阿閣，靈鳳昔來貺。傳聞帝南巡，九成奏崖障。后夔不可作，疇與辨真妄。颺搖翠龍駕，髣髴鉤陳仗。陶唐今復見，臨風重瞻仰。

南海神祠

王士禎

茫茫百粵間，衆水歸扶胥。下滙波羅江，日夜相灌輸。嗟

峨兩虎門衛此陽侯居神宮壓滄溟潮汐在階除我駕
萬斛舟乘風但斯須飛廉送旌麾龍伯為前驅百靈何
蜿蜒穹龜與長魚將命肅牲醴來格神所愉振衣浴日
亭遙見三足烏咫尺躡樊桐覽彼天帝都

清遠道中

樓儼

天生清遠山綿亘數百里於中藏奸人擾擾不能已有
云築長圍盡殺之乃止不然出奇兵搗巢衆亦弛否則
單騎往諭令歸都鄙但恨無田耕何以資生理況彼禁

驚性出桺類虎兇幸今昇平時目擊耕鑿美

懷馬伏波將軍

吳騫

緬懷新息侯慷慨有奇志銅柱勒勲名畧定珠崖地蹉
跎遲暮年據鞍示猛鷲爰平五溪蠻馬革志果遂方征
交趾時跼跼飛鳶墜頗憶少游言云何不憚勦所惜功
方成意改謫旋至疆場矢匪躬忠正異薄植誰云急流
時勇退以稱智

以上五言古

東臯 關忠義廟新鑄大鐘歌 梁佩蘭

金精翕艷光氣榮赤燦紅焰分白青南方祝融驅丙丁
紅爐巨扇搖火鈴華鐘萬石鳧氏成銑鑠篆帶枚擁并
象如鎔于如神鉦躡踞猛簾懸兩楹帝宮齋宿天宇宏
一擊一吼蒲牢聲宣達元氣騰空冥摧惛羣魅朝百靈
維帝在昔征不庭載行處所轟雷霆威揚天轉招搖星
奸雄魄喪不敢聽贅閹貉子心膽傾北南吳魏悉削平
力扶漢鼎勳屬擎旂常日月同勒銘何況殿闕升必馨

銀鐙鐵鳳交洪鳴噴薄忠烈通精誠六鰲地軸橫三城
迷民無耳無目睛劍輪湯鑊予行忽聞帝座洋洋盈
入微出壯音砰訇警回芒蠢一旦醒曠然天地還澄清

夜樂洞

錢以壇

羣仙朝元向夜歸仙樂奏動時張宴靈簫響徹四千里
山神川祇紛謁見大昭小鳴聲嘈嘈拊石擊石總不勞
莊叟枉用說天籟長庚徒自彈琅璈洞中一聽鈞天曲
會見骨青而髓綠谷口兼聞產鳳凰雖和鳴三十六

山水清音尚覺孤自然天樂世間無何況后夔成九奏
熙熙皞皞還唐虞

過含洸

樓儼

桃花紅李花白兩峰春風如送客此來不是米家船袖
中擬買玲瓏石海嶽古人遺像在仙姿瀟灑如親炙脫
使當時無此來含洸那得留題跡風流照耀荒山中一
聲清磬伴朝夕王程催起布帆張詎敢長躡看山屐

以上七言古

電白縣觀海

吳興祚

揚鞭同縱轡咫尺辯滄溟沙向日邊白秋從島外青鯨
鯢今不見樓櫓昔曾經海若知王化年年效百靈

夜宿程鄉道中

吳興祚

落日夜蒼茫匆匆東客裝山風吹淡影溪月生微涼犬
吠黃茅肆人過烟樹鄉計程未百里力倦覺途長

梅嶺

方元

突兀楚山收初含萬象幽翠微開粵路闕物在南州仙

去空壇古猿歸曲洞秋迴看溟海上風關大鵬遊

海幢寺

王邦畿

離城呼小艇隔岸過禪林背地山形小當門海氣深鶴
歸雲有夢松去月無心對此清閒意寧忘長者吟

白雲洞

曾君槩

不知雲瀑處隔嶺隱輕雷峭壁排天出垂虹捲雨來石
牀荒積蘚瑤草入流杯即此堪遺世山阿多桂材

噴玉巖

曾君槩

欲問珠簾僻，遙尋鳥道微。
巖光偏隱客，泉響半侵衣。
石倒和雲卧，烟寒帶葉飛。
十年塵頓洗，忻對羽觴揮。

始興江口

王士禎

西過始興水，湏谿增淥波。

湏水合始興水流始大

推蓬春日下高

枕，粵山多前路。逢瀧吏，迴風起。
蜚歌鼻亭不可問，亂石鬱嵯峨。

出郭巡視田禾賦得青蔥在望中
鄂彌達

萬頃青蔥好，望中翠欲流。
雍雍承上瑞，或或召

天庥少婦調機坐牧童叩角謳解人同着力莫漫共操舟

登鎮海樓

龍為霖

聞道嶺南勝來登第一樓烟雲歸粵秀今古見浮丘何處尋羊跡空餘望虎頭安期如可接攜手赴滄州

以上五言律

海珠

任垞

千頃江光佛界收萍漚一點聚中流圍生青草疑鮫室
煥起丹霞似蜃樓水霧開時幡影繞浪花濺處磬聲浮

還嗟老衲袈裟地戈甲排雲在上頭

丹霞山

陸世楷

石梁劍闕斷還連新築雙隄路蜿蜒金界開時天恰半
珠衣覆處地無偏孤峰儼示輪王相九品中分寶座蓮
紺宇珠衣成不日掌光從此與燈傳

春日燕集五層樓

吳興祚

移將樽酒對清風更上層樓目欲窮萬里間關長作客
十年辛苦半從戎烟銷叢樹春光碧日落孤城夕照紅

戰鼓不聞烽火息東西早已著邊功

其二

越王臺畔落花前握手登臨憶昔賢得句每從寒夜雨
放懷偶向艷陽天風吹蒲澗雲初散潮湧珠江月正圓
此日座中多意氣揮鞭寧讓祖生先

惠州西湖

張尚瑗

周遭郡郭俯清溪迴合江流注北堤浮碧四圍峰遠近
破青雙矗塔高低魚鱗浪蕩傳遷鱸

惠州亦有鱸湖

雁齒橋排

配解屏

惠州東新橋蘇軾解屏帶成之

莫遣中州報尤物馳魂欲向嶺

南迷

登鎮南樓

張尚瑗

選勝遨遊盡日間凌雲傑閣瞰潺湲輪囷綠暗迎冬樹
戍削青浮入檻山舊迹牂牁談霸越新勛碑碣頌平蠻
褰帷具美羣公在也著萍蹤倒載還

長壽菴

曾君槩

郭外叢林暑亦涼慧燈傳影挂長塘濤聲入樹三幡靜

花氣臨階四大香一榻卧能參半偈六時僧自禮空王
行吟竟日無人和閒倚朱闌看鶴翔

題鍛圃

蔣伊

垂楊數曲遶幽棲細草新蒲綠未齊滿塢白雲間秉耒
一畦花雨看扶藜春禽翼翼矯青霄外午磬聲來古寺西
欲問桃源何處是韓城即有武陵溪

其二

鄭圃風光翠欲浮綠陰深處少驚鷗黎雲夢斷蜂鬚老

柳絮風來燕語柔
檻外回塘澄似月
簾前疎雨暝如秋
何時得命剡溪棹
花底清歌一唱酬

送人入安南

梁佩蘭

萬里波濤幾日程
海門飛去片帆輕
魚龍宮闕浮空上
犀象人家繞樹行
寶貨遠通銀豆市
艾花春滿竹棚城
日南本是南交地
况復曩王識姓名

靈洲

梁佩蘭

衣冠自古稱南海
今日來登望氣樓
天入石門分兩峽

山迴鬱水截中流神魚大宅吞溟渤朱鳥高躔翼女牛
碧落東南渾一片不知河漢隔年秋

登鎮海樓

吳文燁

郡閣岩崑遠思勞闌干一一落層臯烟消絳樹三城小
晴入青天五嶺高秦令霸圖歸正朔粵臺瑞靄望周遭
筵前齊奏昇平樂收盡寒風靖海濤

遊羅浮山

潘耒

十年清夢落羅浮乘興聊為萬里遊觀海喜逢雲作市

釣鼇思以月為鉤飛來蝴蝶瑤臺使伐就龍窓弱水舟
身屬閒中無繫縛得淹留處且淹留

南海神廟致祭恭紀五首

李紱

唐祀時修立夏先龍旂四月到颺翩正逢海宇清和候
來告

天家孝德虔南次祝融神最貴火行燦怒氣方然廟門五
夜星辰爛萬里波澄

御膳懸

候火煌煌夜向闌
撞鐘伐鼓肅華班
尚方紫降香初烈
南斗朱旗色未殷
髦士圭璋趨左右
使臣袞繡立中間
天心萬里同昭格
肅穆高居凜妙顏

神燈閃閃殿陰陰
終獻長嚴對越心
升降殿庭三位徧

蜿蜒黼座百靈歆
承筐敢賴如天福

粵中儀注有
飲福受昨禮

沉幣

親看到海深
回聽樂聲催廢徹
扶桑紅影正森森

二千年廟事應訛
訪舊茫然起感多
荒忽仙經傳姓氏

睽睽番鬼望波羅
金旛空憶宋皇祐
銅鼓猶徵漢伏波

最是此間封樹古木綿烏攬總嵯峨

粵中語云山則羅浮樹則波羅

弓刀夾道領輜軒俯瞰蒼茫地勢尊鹿步沙連蠻百峒
虎頭門控海諸蕃和平已聽編氓樂赫濯還褫伏莽魂
淫雨烈風天不作越裳長戴

聖人恩

夏日登拱北樓

梁無技

消夏何須賦遠遊輕風吹上郡城樓天遙北關通諸島
地入南溟截九州簾捲數重山翠出窻開十里海霞收

登臨偶聽銅龍漏一滴疑催萬古秋

登鎮海樓

梁澤

鎮海樓高海不波奇觀表裏壯山河
天空西北卿雲現地缺東南王會多
花發木棉成卉服鳥鳴布穀種嘉禾
憑欄桴鼓無驚日鬱鬱葱葱釀太和

以上七言律

羊城讌集示僚屬

八韻

吳興祚

莫羨綿堯歷山河壯禹謨功思垂兩粵夢豈入三吳鳥

倦飛猶力花殘香未殊西園冠蓋會南國友朋俱洒翰
珠璣落論文風雨趨籌邊遵廟算取士重冰壺白髮
吾顏改丹心此志孚祖鞭各在手黽勉向同途

以上五言排律

同友登鎮海樓

集古

徐旭旦

五仙樓上五層臺

皇甫曾

此日登臨曙色開

崔曙

古堞朱

霞籠白社

杜韋

新豐綠樹起紅埃

王建

春排北極迎鸞

馭

羅鄴

酒近南山作壽杯

宋之問

堤月橋燈好風景

鄭谷

霜晨清晝共徘徊

武元衡

千峰花雨踈簾隔

馬懷素

三島靈

禽拂水迴

李紳

太史能知頻奏瑞

李山甫

仙人共許踏歌

回

黃滔

雲中舞鶴白于雪

李端

檻外長江綠似苔

韋莊

風月無情人別去

李从

江山有待我仍來

薩天錫

知君尚

有凌霄志

曹唐

夾日勲名映上台

朱慶餘

以上七言排律

紅梅驛

王士禎

朝登來鴈亭午過紅梅驛
梅落鴈先歸正有天南客

丹竈

梁佩蘭

蝴蝶如團扇麻姑裁作衣只餘丹竈在不見紫烟飛

以上五言截句

廣州竹枝詞四首

王士禎

潮來濠畔接江波魚藻門邊淨綺羅兩岸畫欄紅照水
蜃船多唱木魚歌

海珠石上柳陰濃隊隊龍舟出浪中一抹斜陽照金碧
齊將孔翠作船篷

梅花已近小春開
朱槿紅桃次第催
杏李枇杷都上市
玉盤三月有楊梅

佛桑花下小迴廊
曲院深深牡蠣牆
細藝海沉銀華火
金籠倒掛試收香

始興江口

姚孔鋹

棹穿亂石轉清波
日暮闌風伏雨過
湏水漸通瀧水濶
始興江口落帆多

甘灘漁父詞

梁迪

雙槳輕搖網乍收上灘流過下灘流上灘流急下灘緩
急處求魚緩泊舟

蜻蜓艇子水中居歲歲鮮魚賤作蔬四五月間魚更美
黃魚膾罷又鮓魚

遊海珠

余象斗

高臺古木早驚秋入夜漁燈兩岸浮猶是昔年講學地
空留明月印川流

鎮海樓

余象斗

五層傑閣半天開無限山河入望來幾樹高松同繫馬
太平歌舞聚朝臺

望羅浮

方曰廣

渺渺仙原不可尋望山不負愛山心何時乞得名山住
四百二峰相對吟

望羅浮

何多藝

雨色初晴彩雀飛千崖珠箔照人衣丹青忽現蓬萊閣
澗水桃花路不違

白鶴峰

何多學

玉局文章擬孟韓
江流石閣瀉奔湍
天開海國垂儀範
瞻拜千秋識鳳鸞

峽山寺

羅孫耀

晴天鳴鳳雨啼猿
誰是攀龍舊子孫
山靜依然成太古
不妨重與話軒轅

月夜登九成臺

陳王猷

溪流一帶女牆隈
月白瑤階虞帝臺
武水聲中琴瑟拊

皇岡重見鳳凰來

梅嶺

許觀光

巨靈雄劈俯層臺
鳥道盤空萬壑迴
章貢水連江北合
車書天闢日南開

鎮海樓

車騰芳

層樓高峙蔚文明
冠冕南州控百城
人在紫霄峰在地
太平佳氣現蓬瀛

以上七言截句

廣東通志卷六十三

欽定四庫全書

廣東通志卷六十四

雜事志

志有雜事即說部之遺意也西京賦云小說九百
起自虞初嗣是而中壘之說苑臨川之世說沿及
元明簡繁帙瑣未盡整於道而碎於辭也故志有
取乎爾顧司馬遷之傳燕太子丹也本燕太子丹
三篇而削去烏頭白馬生角二語後人以為擇焉

而精況粵說最多夸誕亦或寓言什九今槩不錄
錄其有裨史乘廣聞見資懲勸者志雜事

廣州府

南海神

道書南海君姓祝名赤夫人姓翳名鬱寥廟在波羅江
上建自隋開皇年大門內祭碑林立唐韓愈碑在東廊
宋循州刺史陳諫重書神自唐開元時祭典始盛嘗冊
尊為廣利王歲以立夏命廣州刺史行事祠下祝文書

御名宋真宗錫王玉帶至和元年加王冕九旒犀簪導
青纁充耳青衣五章朱裳四章革帶鉤躡綉鞞素單大
帶錦綬劍佩履韞內出花釵九株桂襦簪鎮署曰賜明
順夫人明順者王之夫人皇祐初封號也配以六侯曰
助利侯達奚司空也曰助威侯社司空也曰濟應侯
巡海曹將軍也曰順應侯巡海提點使也曰輔靈侯王
長世子也曰贊寧侯王次子也元時數遣使者奉錦幡
銷金幡金銀香盒吳萊古蹟記言南海廟有玉簡玉簫

玉硯象鞭林靄所獻銅鼓及宋真宗所賜玉帶蕃國刻
金書表龍牙火浣布今皆不存明洪武六年賜黃金香
盒重十六兩黃綾幡一副藩臬春秋仲月壬日祭我

朝另加冊封詳編年志

參舊志

唐韓愈云南海神次最貴在北東西三神河伯之上號
為祝融又南海之帝也家語云水火木金土是為五帝
莊周云南海之帝為倏又曰赤帝淮南子云南方之極
自北戶之界至炎風之野赤帝祝融之所司正義云赤

帝南方赤熛怒之神又雜見七經緯及馬鄭諸儒所云
語其所司石氏星經云南方炎帝其精朱鳥為七宿司
夏司火司南嶽司南海司南方既司水復司火蓋水體
陽用陰火體陰用陽坎離相濟南北互應者也

採補

南海廟銅鼓

并附各
銅鼓考

銅鼓緣起或曰周禮司徒有鼓人掌六鼓四金之事故
範銅為鼓乃周禮遺軌漢時周制尚存故伏波鑄之留
西南甚衆然按周禮四金錡鐻鐃鐸之制如鐘如鈴今

銅鼓絕不相肖且鎛以和鼓鑷以節鼓鐃鐸以止鼓通鼓皆以鼓為主而實非鼓也似難指為銅鼓緣起或曰考之後漢書注廣州記俚獠鑄銅為鼓初成懸之於庭置酒召同類子女各以金銀為大釵執以叩鼓叩畢留遺主人晉書蠻俗富豪子弟留納銅鼓釵宋史蠻號有銅鼓者曰都老衆推服之今之銅鼓蓋諸峒獠所遺然據各史諸說則似不始東漢之初今廟中所藏內有鐃云漢伏波將軍所鑄何以稱焉張穆異聞錄云昔馬伏

波征蠻以山溪易雨因製銅鼓粵人亦謂雷廉至交趾
濱海卑濕革鼓多痺緩不鳴無以振威故伏波始製銅
為之狀亦類鼓名曰駱越之鼓此又一說也

叅補

廟中銅鼓一得之唐節度使鄭綯一得之潯州府知府
所獻制畧小

叅補

右銅鼓原始

廟中銅鼓大小各一大者徑五尺高稱之中空無底釵
垂四懸腰束而臍隆起旁有兩耳通體作絡索連錢及

水漈紋色微青艷若鋪翠光景晶瑩邊際舊有六鼃今
不存小者殺大者五之一高亦稱之製類大者其四角
舊有金蝦蟆五為番人所竊聲遂稍石色純綠作鷓鴣
斑斜文纖麗隱若八卦

附考

唐時有牧童掘得銅鼓形如腰鼓其旁多鑄鼃黿之狀

嶺表
錄異

銅鼓其身徧有花草蟲魚之狀

同上

銅鼓一頭有面面與身連全用銅鑄鼓面圓一尺許或

二尺許同上

銅鼓皆構精銅極堅紋縷亦頗精

老學庵筆記

銅鼓深三尺許面徑可三尺五寸旁圍漸縮如腰形復

微展而稍弇其口

西事珥

明永樂中萬州土官黃惠於多輝溪中得一銅鼓長三尺面濶五尺凸二寸許沿邊皆蝌蚪各銜線縷抵臍束腰彥尾若今之杖鼓者然又萬厯間茂名縣溪水陡發

湧出銅鼓徑三尺高二尺有奇面列鼃蛤六徧體作細篆文有硃砂積翠蝸蝕之孔凡十餘又羅定城隍廟有銅鼓高二尺五寸徑二尺又雷州英靈岡雷廟有銅鼓二其色如大鑪圍徑五尺許高亦如之在左者面邊蟻六右者蟻五其旁皆有兩耳每耳又分而二之耳下有一獸首反俯下足尾入於郭左者土花剝蝕右者質理瑩然如碧玉其面稍廉中心微拱而平其暈有十二圈暈各一聲暈中夾平綈如波紋兩圈作連錢文旁紋人

字如莞簞其綈作雷紋斜方斗紋色翠綠徹骨有一綫
丹氣午後乘陰蒼潤玉滴午前象褐色稍淡蝕處如蝸

篆

參補

右銅鼓制度

南海廟中銅鼓相傳其鳴應潮自遭盜劫靈龜殘缺遂
不復自鳴又傳銅鼓之大者舊雌雄各一今廟中所存
者雄也其雌向遇風雷飛入獅子海中今雄鳴則其雌
輒相應歲二月十三日海神壽日粵人擊之以娛神其

音闐鞀鏗鎗若行雷隱隱

參補

附考

銅鼓或以革掩底或積水甕中蓋而繫之聲聞十餘里

外叩鼃蛤其聲益遠

參補

蠻人攻伐時則聲銅鼓至者如雲

晉書

擊之響亮不下鳴鼃

續表錄異

兩人舁行以手拊之聲全似鞀鼓

桂海虞衡志

蠻中銅鼓有剝蝕而聲響者為上上易牛千頭次響者

七八百頭

湧幢小品

右銅鼓聲音

南海廟中銅鼓大者相傳自海中浮至明嘉靖間海盜

曾一本謀移去鐵索忽斷不可舉乃已

參補雌者飛入海見上聲音

考

小者相傳得之潯洲銅鼓灘灘水湍急舂石底作銅鼓

聲入夜輒有光怪一日水涸銅鼓出焉

參補

附考

有人聞田中蛤鳴往捕之見蛤跳入穴中掘之得銅鼓

荷表
錄異

羅定城隍廟銅鼓凡州人爭訟不平及被讎求雪者擊

之則咎有攸歸無事而擊則殃擊者

參補

銅鼓皆伏波瘞以鎮蠻每遇風雨輒有聲循其聲之所

出往往掘得銅鼓故廉州有銅鼓塘欽州有銅鼓村靈

山有銅鼓嶺文昌萬州亦有銅鼓嶺皆以掘得銅鼓而

名
參補

右銅鼓神異

天后

海舶祀天后者相傳為湄州林氏女至孝能知人禍福
沒而衆祠之航海者禱輒應宋封靈惠夫人元封天妃
明封護國聖妃今天后祈求必應凡下東西二洋造船
別為一舶如其製而小置神前凡覆溺傾敗兆必先見
在洋中或渡瓊海每遇顛危虔誠拜禱即有神火集桅
上或有江鷗一雙入倉集神前舟楫即時鎮定至今神

之舊志

禾穀夫人

禾穀夫人或云后稷之母姜嫄也今香山村落皆祀之

補 參

趙佗四臺

趙佗築臺凡四一在廣州北門外固岡上曰朝漢臺一在廣州粵秀山上曰越王臺今名歌舞岡一在肇慶新興縣南十五里曰白鹿臺佗獵得白鹿因築臺以志其

喜一在惠州長樂縣五華山上曰長樂臺蓋佗受漢封時所築長樂本龍川地佗之舊治也故築臺是曰趙佗四臺或云越王臺最先築長樂次之白鹿次之最後築

朝漢臺

衆補

韓信後

廣南有韋氏者韓信之後也當淮陰既縛信有客匿其孤求撫於蕭相國相國作書致南粵尉佗佗素重信又憐其冤慨然受託姓之以韋者去其韓之半也孤後入

粵西有武功世長海墘受鐵券至今蕭何與尉佗書尚

勒鼎彝昭然可考

尚谿
織志

芝蘭湖

番禺北有芝蘭湖旁多人家其流南注西湖今在北城
外雙井街周家治圃得斷礎有古詩云芝蘭生深林無
人長自芳君子處此庭明德惟馨香游魚扱且躍好鳥
名鴛鴦微風動林岸此心共迴翔其下斷缺數字

南越
志

河畔雪

唐許渾詩河畔雪飛揚子宅揚子漢議郎楊孚也字孝元嘗樹河南五鬣松於廣城北岸粵本無雪至是乃降後有張瓊者掘地得磚曰楊孝元宅

舊志

舊藩府

廣州府有新城舊城舊城向為平藩尚可喜駐鎮大小衙門俱在新城自蕩平後衙門仍入舊城巡撫衙門為尚可喜府第將軍衙門為尚之孝府第舊僭為九間殿今為將軍府將軍王永譽分為三脊始敢居之大堂前

榮有拜單石深一丈二尺濶六丈門前石獅乃耿逆在
粵時從肇慶取石為之高大雄駿東南希有後移藩閩
中故之孝居之今新城各衙門俱移僅存總督衙門為
入省駐節之地

嶺南
雜記

虛市

越之市名為虛多在村場先期招集各商或歌舞以來
之荆南嶺表皆然蓋市之所在有人則滿無人則虛嶺
南村市滿時少虛時多故謂之虛

南越
志

飛鋏 瓊州附

順治庚子廣州有白鋏數萬錠飛於空中自南而北一官焚香拜之飛下近簷竟復飛去有為之賦飛鋏行者

嶺南雜記

康熙三十八年五六兩月廣東瓊州府有元寶從空中飛過往南一路而去有聲鏗鏗然前有黃旗二面中元寶不計其數末有黃色如紙條尾之自午初至未刻方止如此者兩月凡官吏兵民無不仰視

述異記

按此二事頗怪然金銀有神常思利見故窖藏之物
往往無翼而飛以此知窖藏之無益也

五里四會元父子四元

倫文叙及子以訓梁儲霍韜皆舉會試第一皆南海縣
人皆居縣治西三十里有村曰黎涌石碯石頭相去僅
五里倫居黎涌梁居石碯霍居石頭故世稱五里四會
元而文叙後中狀元以訓榜眼以諒解元進士以詵進
士故世稱父子四元科名之盛殆極一時又倫文叙霍

韜以儒士入科中式未嘗一日為諸生是尤為異

參補

百歲觀場兩預鹿鳴

順德人黃章年近四旬寄籍新寧為博士弟子六十餘歲試優補廩八十三歲貢名太學康熙己卯入闈秋試大書百歲觀場四字於燈令其曾孫前導同學之士有異而問之者曰我今年九十九非得意時也俟一百二歲乃獲雋耳督撫兩官召見授餐其飯啖俱過常人各贈金幣遣之而是科潮州吳日炎以十四歲中式

參補

又有東莞尹之達者順治丁酉科舉人至康熙丁酉年
八十九歲秋榜發巡撫復延赴鹿鳴宴一人兩與丁酉
宴亦希有事也主試嚴思位贈詩云六十年前攀桂客
天留碩果到今時已從石室傳丹訣復與瓊筵泛玉卮
金粟山頭清白吏珊瑚洲畔去來詞非潛非見窮經術
百歲常為後輩師

參補
地球

海豐舉人

又雍正癸卯有新安舉人麥
洪首闢俱係康熙二

年癸卯中式重與雍正癸
卯鹿鳴宴年皆八十餘

四鼓

粵中水塘宵更禁五鼓僅四鼓而天已明矣相傳擊五鼓則潮水泛溢此亦悠繆之說然城中仍五嚴也

嶺南雜記

澳門

香山百里外其山從海濱發支如蓮蓬插入海中有城皆番人所居無漢人離澳設關以稽人口出入其地不產米鹽蔬菜俱內地運出城中有西洋官職如侍郎粵東文書事件往還俱用通事其俗見人以摘帽為禮凡內地所用犀象香珀哆囉啤吱羽緞羽紗蘇木椒檀玻

聚種種洋物皆與之互市

嶺南雜記

自生火

南海蕭丘之上有自生之火春起秋滅上純生一種木雖為火所着但少焦黑人或得以為薪炊熟則灌滅之用之不窮

抱璞子

金花普主

靈應祠廣州仙湖之西其故老相傳神廣之金氏女也少為巫時稱為金花小娘後沒於仙湖之水數日不壞

且有異香里人陳觀見而異之偕衆舉殮得香木如人形因刻像立祠祈嗣往往有應祠毀成化五年巡撫都御史陳濂重建稱為金花普主惠福夫人張詡題詩王顏當日睹金花化作仙湖水面霞霞本無心還片片晚風吹落萬人家嘉靖初提學魏校毀其祠焚其像然廣人篤信於今立金花會

舊志

神女石

神女石一名望夫石在碧雲峯南高三十餘丈絕肖人

形作望遠狀居民晨出者常見緋衣女子徘徊石下正
德中一日晴空無雲暴雷擊石墮其鬚幾二尺餘

西樵志

盤古氏墓

盤古氏墓在南海蠻峒中亘三百餘步相傳云後人追
葬盤古之魂也兩廣峒蠻多相傳為盤瓠之後或譌為

盤古云

述異記

神弩

交州外域記曰交趾未有郡縣之時土地有雒田其田

從潮水上下民墾食其田因名為雒民設雒王雒侯主
諸郡縣縣多為雒將雒將銅印青綬後蜀王子將兵三
萬來討雒王雒侯服諸雒將蜀王子因稱為安陽王南
粵王佗舉衆攻安陽安陽王有神人名臯通下輔佐為
安陽王治神弩一張一發殺三百人南越王知不可戰
却軍住武寧縣遣太子名始降服安陽王稱臣事之乃
安陽王不知通神人遇之無道通便去安陽王有女名
曰眉珠見始端正重焉始問珠令取父弩視之始見弩

便盜以鋸截努訖逃歸報越王越進兵攻之安陽王發
努努折遂敗安陽王下船還出南海

水經注

粵三宦者

唐高力士高州人馮盎之曾孫也嶺南討擊使李千里
以為閹兒進之武后武后賜高延福為假子遂冒其姓
明皇時累加左監門衛大將軍事上忠謹帝常用其言
其母麥氏在潘州力士迎歸而不相識母曰兒胸前七
黑子在否又出金環曰此兒幼所服也遂相持而哭帝

封麥氏為越國夫人力士後從帝幸蜀進齊國公及還京為李輔國所構流巫州其地多薺而不食力士感而咏曰兩京稱勛買五谿無人採南北雖不同氣味終不改會赦歸卒陪葬泰陵

參舊志

五代南漢邵廷珣東莞人事劉鋹為常侍累遷內侍監上柱國禹餘宮使宋太祖受禪廷珣言於鋹曰漢乘亂居此五十餘年幸中國多故干戈不及聞宋君有一天下之志今益邊兵欲窺我地宜修兵為備鋹惜然不以

為慮惡其直言恨之及宋師克郴州鉉所遣將暨彥贊戰死餘衆退保韶州鉉於是始思廷琬言加廷琬東面招討使於是招輯亡叛訓士卒修戰備國人賴以少安會有投匿名書者譖廷琬將圖不軌鉉信之遣使賜廷琬死士卒排軍門見使者訴廷琬無反狀請加考驗弗許乃相與立廟洸口祀之頗有靈

衆五代史

明雲奇南海人洪武十三年丞相胡惟庸謀逆誑言居第中井湧醴泉邀駕往觀駕出西華門內使雲奇衝蹕

勒馬卒惶急舌駛不能言撾捶亂下以手指惟庸第臂
幾折弗為縮洪武帝悟登城眺之見兵氣隱隱即掩捕
伏誅召奇死矣追封右少監賜葬鍾山

叅明史

按唐宦者楊思勗仇士良俱係粵產然不足志宦者
邵成章白鶚係謫官於粵亦不必志姑錄此三人以
表宦官之可傳者

羅浮鎮寶

羅浮有鎮山銅龍六銅魚一二物雖似銅鑄細玩則非

金非石非銅非鐵龍各具四足而微鱗魚空洞其中而無孔其輕有若木葉實神物也藏於觀中明嘉靖戊午文移取之

舊志

黑鯢

黑河北極也其水濃黑不流上雲生焉有黑鯢千尺如鯨常飛往南海或宕而失所死於南海之濱肉骨皆消唯膽如石上仙藥也

拾遺記

吳八神祠

祠在濠畔街相傳神姓吳行八浙之紹興人前明時客於粵晨起見有人踞井上黑氣旋繞吳怪問之曰我司疫者凡飲此井俱斃踰七日則無害矣言訖歟失所在吳於是晝夜守井有來汲者告焉或弗信則以死持之洎七日吳曰可矣然吾當先試之掬水而飲飲訖輒病死鄉人醵錢葬其所而祀焉或云吳見鬼物以身入井救之

參補

韶州府

鐵鼓

韶州盧忠惠祠有鐵鼓一面微損擊之有聲先時江中有一蛟舟行者多為害光稠以鐵為鼓及船使役人乘之一日夜來往五羊得蛟斬之至今蛟骨二段存祠中蓋以鐵物治蛟乃金剋木之道龍性畏鐵蛟亦是皆屬木故以金制之伏波鑄鐵船沉於合浦其亦以鎮壓毒蛟而已

採補

陰城

韶州府城上周圍俱蓋房舍兵環居之不作女牆謂之陰城最便堅守康熙乙卯吳逆遣吳國柱馬寶攻之年

餘不能克

嶺南雜記

峽山寺犧尊

秦時犧尊制作奇古宋宣和間有以勢取舟中出峽遭風濤懼甚乃還之廟中今無矣廟亦廢

舊志

周府君碑跋

歐文右漢桂陽周府君碑按韶州圖經云後漢桂陽太

守周府君碑其廟在樂昌縣西一百一十八里武溪上
武溪驚湍激石流數百里昔馬援南征其門人袁寄生
善吹笛援為作歌和之名曰武溪深其辭曰滔滔武溪
一何深鳥飛不渡獸不能臨嗟哉武溪何毒淫周使君
開此溪下合滇水挂陽人為立廟刻石又云碑在廟中
郭蒼文今碑文磨滅云府君字君光而名已訛缺不可
辨圖經但云周使君亦不著其名後漢書又無傳遂不
知為何人也碑首題云神漢者如唐人云聖唐爾蓋當

時已為此語而史傳他書無之獨見於此碑也南豐集
熙寧八年某從知韶州王之材求得此本之材又以書
來曰按曲江縣圖經周府君名昕字君光則永叔云圖
經不著其名者蓋未之詳也又有碑陰列故吏及工師
官號州里姓名之材并模以來永叔蓋未之得也其碑
陰曲江字皆作曲紅而蒼江字江夏字亦作紅蓋古字
通用不可不知此學者所以貴乎博覽也永叔又記劉
原父所得商洛之鼎銘云惟十有三月旁死魄君謨因

問十四月者何謂原父不能言也以某考之古字如亦作𧀂人作允之類皆重出如此者甚衆則此文作三者特二字耳永叔原父君謨皆博識而亦有所未達學者又不可不知故并見之於此也

舊志

南雄府

梅嶺

越王子孫在丹陽鄉更姓梅梅里是也今豫章三十里有梅嶺當古驛道相傳將軍梅鎬屋臺嶺因呼梅嶺云

正義曰據地志梅嶺在乾化縣東北二十八里即唐九齡開鑿大庾之路

舊志

連溪

水經注連溪山即大庾嶺也五嶺之最東矣故曰東嶠山其下船路名連溪連水流注於東溪庾仲初謂之庾嶠東溪亦名東江又曰始興水又西邪階水注之水出縣東南邪階山水有別源曰巢頭重嶺衾瀧湍奔相屬祖源雙注合為一川水側有鼻帝子城鼻帝子所未聞

也邪溪水又西北注於東江

舊志

何公廟

廟在府城東三十里亡其名後周時為廣東叅軍往征南海死於賊鄉人為立祠宋熙寧間贈侍御清海軍使

舊志

梁侯祠

祠在保昌縣東一百里地名黃團宋嘉定中峒寇犯境摧鋒將梁滿戰死提刑廖德明謂其忠勇可尚立祠以

祀之舊志

惠州府

梅花夢

隋開皇中趙師雄遷羅浮一日天寒日暮在醉醒間於松林酒肆旁舍見一女人淡粧素服出迓師雄時已昏黑月色微明師雄與語言極清麗芳香襲人因叩酒肆門相與飲少頃有一綠衣童來笑歌戲舞師雄醉寢但覺風寒相襲久之東方已白起視在梅花樹下有翠

羽啾嘈相顧月落參橫惆悵而已

龍城錄

羅浮山

羅浮者二山合體高三千丈有七十石室七十二長溪

神明神禽玉樹朱草山有龜淵淵有缺龜龜鼻貫銅環

有人擾此淵即雨

羅浮山記

霍仙

秦霍龍龍川人始皇時避亂卜隱太乙山巖遇真人授以金液還生丹後遇瘴濟人名傳於世後人名此山曰

霍山

微蒙
石記

碧霞丹

唐顏真卿為盧杞所搆陷令單車問罪於李希烈促裝
東邁內外知不還矣親族相餞於長樂坡因謂諸姻族
曰吾早典郡於江南曾與道士陶八八授與一刀圭碧
霞丹令服之自後體健至今不衰謂我七十上有厄如
有即吉他日待我於羅浮山得非今日之厄乎遂至汜
水忽逢陶笑謂公曰吉吉遂指嵩少而去及至汴州希

烈僭號使人害於近郊及希烈敗詔得歸葬偃師北山
後有商人至羅浮忽見兩道人樹下圍棋一道士謂商
人曰子何人對曰洛陽人道士笑曰奉寄一書達吾家
也立札一封題寄偃師北山顏家商人至偃師詢所居
地乃即塋庄也守冢老蒼頭得書大驚曰先太師親翰
也因以藏於室子孫選吉日發冢開棺即已空矣於是
徑往羅浮求之竟無跡

舊志

羅浮仙

陳永定間仙人見於羅浮山寺小石樓長三丈餘通身潔白衣服楚麗廣州刺史歐陽頎表上其事

陳書

羅浮神

唐武后時遣使羅浮採藥會使者迷路禱於山神是夕羣象踏山開路因建平雲閣張鷟立碑記其事

府志

米穴醴泉

龍川霍山青華觀即太乙宮巖也巖內有穴唐會昌中有米從穴出日供十餘人饌後有僧將穴鑿巨冀其多

出米乃止巖後又有醴泉昔時出酒味極清冽日滿數斗今泉湑然出猶帶酒味間或如酒可飲即以為瑞云

府志

潮州府

大顛書

韓昌黎與大顛書前人論之詳矣蘇東坡則力言其為偽朱晦庵則力辨以為真未有折其衷者某觀黃東發之說有云韓與大顛書東坡謂妄撰而晦翁載其全書

以為真夫蘇公學佛猶辨其為偽而先生闢佛反指以
為真所不可曉況據韓文韓公止因祭神至海上曾與
大顛語今請之者四書又亟以道為望安有平日謂道
其所道非吾所道而一旦求之亟如此使其既與習熟
而少變其說尚近人情今未之曾見而先欲聞其道尤
不可曉也按東發朱子之徒其說如此天下之公言也
且李漢編韓文序謂收拾遺文無有遺墜總其目七百
篇今內集是也外集皆非韓作而此正在外集其為妄

撰尤灼然矣

丹鉛
餘錄

張睢陽廟

宋熙寧中潮郡遣軍校鍾姓名英者貢方物於朝道經
睢陽唐張公巡許公遠雙廟在焉英齋沐詣廟丐靈是
夜夢神告以殿後匱中有神像十二銅輓一錫汝奉歸
以祀潮陽東山東嶽廟左可數十步有佛寺之陰大石
屹立其上下宜建祠以妥靈英趨京卒事還具酒脯答
神貺取所錫而還置於嶽祠俄而立化常有玄旌樹於

嶽麓寺中夜見光怪僧徒駭怖走白有司移寺以宅神
凡有禱求其應響甚事聞於朝二公冊封王爵賜廟額
曰靈威誠稀濶事也宋文天祥題為子死孝為臣死忠
死又何妨自光嶽氣分士無全節君臣大義誰負剛腸
罵賊張巡愛君許遠留取聲名萬古香後來者無二公
之操百鍊之鋼人生翕歛云亡好烈烈轟轟做一場使
當時負國甘心折節安得留芳古廟幽沉遺容儼雅枯
木寒鴉幾夕陽郵亭下有奸雄過此子細思量

府志

陸丞相墓

郡守葉元玉復張調求陸丞相墓書承命求陸侍郎墓
訪得本郡有高士陸大策者為童稚時聞其先人云南
關陸氏尚有忠正神主在堂又有墓在澳山北青徑口
及譜存焉惜乎譜遭兵燹不完存者僅二葉耳亟索而
讀之公諱秀夫字君實諡曰忠正乃楚州鹽城人也後
徙家鎮江宋景定初進士性沉靜不苟求知矜莊終日
未常少有希合處李庭芝鎮淮南辟置幕中擢以叅議

德祐初復擢禮部侍郎使軍前議和不就二王走溫州
追從之益王立福州進端明學士簽書樞密院事時君
臣顛越海濱每朝會間儼然正笏立如治朝因以陳宜
中譖遂謫於潮公四子有曰繇者好漁獵而放跡海島
繇以壽終於潮而末破爛不知所云其二葉有水村劉
堦詩一章云天地無託足海天同缺光明知復何為不
忍隳三剛裸薦覬少延謳譌寧遠忘或者莒在齊聊且
帝一方竭蹶意委頓臣謀非不臧運去天莫留力盡心

彌強終不負吾主名義天地長懷璽隨龍遊舉意水中
央斯人文華士乃爾百鍊鋼機雲儻通譜應羞朝洛陽
又家藏廣陵牡丹卷破爛已甚詩讀不能句後偶見白
石樵唱稿乃宋淳祐間林霽山所著中有題陸大叅秀
夫廣陵牡丹詩詩卷云南海英魂叫不醒舊題重展墨
香凝當時京洛花無主猶有春風寄廣陵大策又於丁
巳年行弔海邊陳秀才家默念其宗在彼也因訪問鄉
人此有陸氏何在或答云陸氏住於沙岡其地相去不

遠皆陸丞相之後也今學士館其址尚存時大策直造其地請相見老者曰自宋而來吾乃陸學士之後也祖居於此其後子孫散處有家城南者有家城東者大策曰翁稱陸氏之後有據乎老者引大策入左畔青麻園指其地曰此學士館遺址也其蓮花石礫約丈許天井堦欄次第如故大策曰我聞丞相驅妻子赴海寧復有子孫乎老者曰自先人相傳學士有一子好漁獵被逐遂家於海島後學士奉幼主於此識其地也言訖大策

告曰吾正城東陸也老者設飯以待大策而別生得此甚喜但云墓於澳山北青徑口蓋此一處海面有隆南青深四澳青徑口不知屬何澳也大策既為陸侍郎後即當遣人并强大策親往必求其所謂青徑口者儻墳竟不可求生當於韓文公祠堂左山下稍寬平處構一祠專祀之庶忠魂得少慰焉

崖山舊志

山神化蛇

紹聖初年朝臣劉安世器之尤為章惇蔡卞所忌遠謫

嶺外盛夏奉老母以行一日行山中扶其母籃舁憩樹下有
大蛇冉冉而至草木皆披靡擔夫驚走器之不動也蛇若相
向者久之乃去村民羅拜曰公異人也蛇乃此山之神見公
喜相迎耳

事文類聚

吳六奇軼事

浙江舉人有查繼佐者常自謂海內奇傑非從塵埃中物色未
可得也家居歲暮命酒獨酌頃之彤雲四合雪大如掌因緩步
至門見一丐者避雪廡下強直而立繼

佐熟視良久心異之因呼之入坐而問曰我聞街市間
有手不曳杖口若銜枚敝衣枵腹而無餓寒之色人皆
稱爲鐵丐者是汝耶曰是也問能飲乎曰能因令侍童
以壺中餘酒傾甌與飲丐者舉壺立盡繼佐大喜復熾
炭發醕與之約曰汝以甌飲我以卮酬竭此醕乃止丐
盡三十餘甌無醉容而繼佐頽卧矣侍童扶掖入內丐
遂巡出仍宿廡下達旦雪霽繼佐酒醒謂其家人曰我
昨與鐵丐對飲甚懽觀其衣極藍縷何以禦此嚴寒亟

以我絮袍與之丐披袍而去亦不求見致謝明年繼佐
寓杭之長明寺暮春之初偕侶攜觴薄遊湖上忽遇前
丐於放鶴亭側露肘跣足昂首獨行復挈之歸寺詢以
舊袍何在曰時當春杪安用此為已質錢付酒家矣繼
佐竒其言因問曾讀書識字否丐曰不讀書識字不至
為丐也繼佐悚然心動薰沐而衣履之徐諭其姓氏里
居丐曰僕系出延陵心儀曲逆家居粵海名曰六竒祇
以早失父兄性好豪飲遂致落拓江湖流轉至此因念

叩門乞食昔賢不免僕何人斯敢以為污不謂獲邁明
公賞於風塵之外加以推解之恩僕雖非淮陰少年然
一飯之惠其敢忘乎繼佐亟起而捉其臂曰吳生固海
內奇傑也我以酒友目吳生失吳生矣仍命寺僧沽市
中酒一石相與日夕痛飲盤桓累月贈以屨之資遣
歸粵東六奇世居潮州為吳觀察道夫之後涉獵詩書
浪遊湖海於關河孔道險阻形勝無不諳熟明季委守
豐順 大師由浙入廣六奇迎謁軍門麾下請見主帥

備陳粵中形勢傳檄可定且曰奇有香火兄弟三十人
素號雄武祇以四海無主擁衆據土弄兵潢池方今
泰運當陽義旌南下正蒸庶徯蘇之會豪傑効用之
秋苟假奇以遊劄三十道先往馳諭散給羣豪近者迎
降遠者響應不踰月而破竹之形成矣帥從其言由是
六奇運箸之謀所投必合扛鼎之勇無堅不破征閩討
蜀屢立奇功數年之間位至通省水陸提督當六奇流
落不偶時自分悠悠一世無知己者獲遇查繼佐解袍

衡門贈金蕭寺且有海內奇傑之譽果能奮跡行間進
階開闢康熙初駐節循州即遣牙將持三千金存其家
另奉書幣邀致繼佐來粵供帳舟輿俱極腆備將度梅
嶺遣其子迎候道左執禮甚恭樓船簫鼓由胥江順流
而南凡轄下文武僚屬無不願見查舉人去州城二十
里六奇躬自出迎八驕前馳千兵後擁導從儀衛上擬
侯王既迎繼佐至府則涕泣蒲伏泥首自稱昔年賤丐
非遇先生何有今日幸先生辱臨糜丐之身未足酬德

居一載軍事旁午凡繼佐一言無不立從其歸也復以
三千金贈行曰非敢云報聊以誌淮陰少年之感耳既
而繼佐悞罹奇禍亦藉六奇奏辨得雪初繼佐之在幕
府也園亭極勝中有英石峯一座高可二丈許嵌空玲
瓏若出鬼製繼佐極所賞題曰縹雲閣旬往視忽失此
石則已命載巨艦送至繼佐家矣涉江踰嶺費亦千金
採補

肇慶府

斗姥

斗姥像在肇慶七星巖名摩利支天菩薩亦名天后花冠瓔珞赤足兩手合掌兩手擎日月兩手握劍天女二捧盤在左右盤一羊頭一兔頭前總制熊文燦之所造也文燦招撫鄭芝龍時使芝龍與海寇劉香大戰菩薩見形空中香因敗滅文燦以為菩薩即玄女蚩尤為暴時黃帝仰天而歎天遣玄女下授黃帝兵符伏蚩尤又嘗下天女曰魃以止蚩尤風雨古聖人用兵皆以神女

為助於是傾貲十餘萬為宮殿極其壯麗以答之按今廣州府粵秀山上亦有斗姥殿像亦莊嚴

採補

總督旗竿

兩廣總督轅門兩旗竿東西省各主其一康熙丙寅二月白晝飛火忽焚其右焦灼過半是年孫延齡叛竊據

桂林

採補

烈女祠

自仙羊而上入綏水六十里為四會縣踰水之三十里

近西數峯林巒蔚然崇岡突下四望平遠是為貞山烈女之祠舊記唐貞觀元年建妙虛宮歲久為墟後一百六十年實貞元三年有女文氏父母已許鮑生未嫁生樵山斃於虎文氏匍匐服其喪事公姑謹潔忽然歸遁於山之陰不與世接影響冥邈人莫測其處貞元十七年高秋九日天氣澄徹俄有異雲起西南幡幢管磬擁一婦人於香靄間謹謂文氏女仙去今昇仙壇俱存即其下為祠晨香夕燈歲時不懈遇水旱祈禱無不昭告

貞烈
祠記

陸大夫廟

漢陸賈使南越尉佗與之泛舟至此賈默禱曰我若說
越肯稱臣當以錦裹石為山靈報使還遂募人植花卉
以代錦後人因立廟祀之宋乾道間梁竑入都艤舟石
下夜夢一客自稱陸大夫云我抑鬱於此千餘歲矣茲
者君幸見臨願留一詩竑題詩於壁而去

夷堅志

石峒神

石峒神周氏高要人唐貞觀初封周正公五代南漢加
王爵祠於峒中去府城北十里將軍嶺之東七星巖之
北一峯虎踞巖穴天關南北二門上虛通天四旁異石
彷彿與馬徒御拱列呵護異禽鳴嘯出沒空處聲傳遇
潦水漲湓狂風怒濤則峒有龍歸世傳謂神還宮皇祐
四年儂寇至合城陰禱其寇不終夕而遂遁去人民安

堵

府志

李曇僕

王達者屯田郎中李曇僕夫也事曇久曇親信之既而去曇應募為兵十年會曇以子孝學妖術事敗夫婦械繫御史臺獄具曇平生親友無一人敢嚮問者達獨旦夕守門不離給服供食者幾兩月曇貶恩州別駕諸子皆流嶺南仍使人監防出國門達追泣而隨之防者過之達曰此我主人也豈不得相隨乎曇河朔人不習嶺南水土其家人皆辭去達獨在左右不忍去數日曇自縊死旁無家人達為之治喪事如親父子見者皆流涕

及殞雲於城南佛舍然後歸

灼艾集

高州府

金井

金井在觀山潘茂名昇仙處有二井一曰金井二曰玉

井

府志

石船

在潘山上茂名常煉丹於此

一統志

石龍鳴

化州治之後有石潛轟江中謂之龍尾州庭左偏有石
微露出地上謂之龍首州人神之圍以欄杆不敢褻守
倅將祭時夜靜則鳴聲類鵠而洪大特甚景泰八年州
同知楊景生子一清其夜石龍大吼兼有靈異

舊志

龐夫人

龐瀑在縣北二十五里高三十餘丈周圍二十餘里頂
上洪厓陡壁中有石堂可坐數十人水從厓下瀆出上
有龐氏夫人之祠遇旱精誠祈禱雨即如注稍有不謹

雖禱無雨在今東坑是也

府舊志

王健配嶺南

宋真宗時有王健者江州長江人少時薄遊江界至星子縣夜宿逆旅遇道士授黃白術未盡其要後再遇其人於茅山相攜至歷陽指示靈草并傳以和合密訣試皆有驗仍別付靈方緘滕之戒曰非遇人君慎勿輕述健後以佯狂抵禁配流嶺南時供奉官閣下祇候謝德權適總巡兵頗聞其異健後竄歸闕下德權乃館於私

第煉成藥銀上進真宗異之命解軍籍使劉承珪詰其事健以師戒嚴終不敢泄唯願見至尊面陳於是承珪乃為健改名中正得召見即授許州散掾留止京師尋授神武將軍致仕仍給全俸遷高州刺史康州團練使前後貢藥金銀累巨萬輝彩絕異不類世寶當時賜天慶觀金寶牌即其金所鑄也然中正亦不敢妄費唯周貧乏崇奉仙釋今汀州開元寺乃其施材所建也卒贈嶺南節度使此近古所未聞也其遷刺高州蓋遙領之

萬花
谷

廉州府

杉葉詩

劉欣期交州記云合浦東百里有杉樹葉落隨風飄入
洛陽城內漢時有望氣者曰此休徵也庾信詩傳聞合
浦葉遠向洛陽飛薛道衡詩杉葉朝飛向洛京吳均詩
三秋合浦葉皇甫丹詩心隨合浦葉楊炯文合浦杉葉
飛向洛陽李羣玉序向洛水而北飛所指皆此葉也

郡參

志

龍門

有龍門水深百尋大魚登此化成龍不得過曝腮點額
血流此水恒如丹池即欽州龍門江也

交州記

銅柱

銅柱非一南裔異物志昔馬文淵積石為塘達於象浦
建金標為南極之界林邑記建武十九年馬援植兩銅
柱於象林南界與西屠國分漢南疆晉地理志日南郡

有銅柱漢立此為界今尚存隋書大業元年劉方敗林
邑經馬援銅柱南八日至其國都刻石紀功唐南蠻傳
林邑南大浦有五銅柱山形若倚蓋西重巖東涯海漢
馬援所植也至唐明皇時詔何履光以兵定南詔取安
寧城及鹽井復立馬援銅柱乃還柳文安南都護張舟
復立銅柱馬總傳元和中以虔州刺史遷安南都護廉
清不撓用儒術教其俗政事嘉美獠夷安之建二銅柱
於漢故處鏡著唐德以明伏波之裔五代史晉天福五

年楚馬希範平羣蠻自謂伏波之後立銅柱於溪州杜
甫諸將詩回首扶桑銅柱標冥冥氛祲未全銷越裳翡
翠無消息南海明珠久寂寥殊錫曾為大司馬總戎皆
插侍中貂炎風朔雪天王地只在忠良翊聖朝

參舊志

銅船

合浦四十里南有一湖每陰雨日百姓見有銅船出水
又有一牛在湖中以雞酒為祭便大獲魚

交州記

馬伏波運河舊道

合浦大沈港有潮西通九河江江口有赤羊壑蛋人取
螺於此又名赤螺壑相傳漢馬援征交趾時駐軍合浦
由外海運糧恒苦烏雷風濤之險及海寇攘劫之患遂
以昏夜鑿白皮蜂腰之地以通糧艘此河通龍門七十
二徑直抵欽城其掘鑿處約長七八里闊五六丈深三
四尺今兩頭潮水尚通但中間堙塞此水一開實欽廉
舟楫之利明嘉靖知府張某欲鑿之不果

府志

天涯海角

天涯海角言遠也而欽州有天涯亭廉州有海角亭

言鱗

象牙

象性最靈徐少溪從植庭旣宦合浦其地有象非其土
產乃從安南來者能過海於水底行捕魚食之欲換氣
則浮以鼻向天若植桅然良久復沒偶一歲颶風大作
羣象不能呼吸皆死數日浮薄岸牙骨悉為珠池太監
所得其後以秋七八月至食人禾稻村人悉起持兵器
擊鑼鼓罵之象佇聽良久轉羣奔去至他所亦然或設

陷坑每歲亦得二三隻常問外夷云取之法若欲活者則家畜象囹使就野象水草久之情熟則誘一二野象離其羣俟稍遠象囹各以鼻纏其足拖歸其家預掘坑以待之象囹置野象於坑中飢之三四日乃為假人以篙懸而下騎之象見假人大躍地為之震復引假人而上每日如是數次俟稍馴投之草料久之象奴下騎之月餘益馴與家象同方砍地出之象牙自蛻者色黯生牙自有肉紅色可辨如欲取象牙亦使象囹有野羣象

入夾山中度行遠象罔急奔出則衆人悉力置竹鎗埋鹿角掘坑塹外圍既固其中水草盡則群象死無論多

寡皆得其牙

月山叢談

鑿橫石

交趾以北鉅南海有水路多覆巨舟高駢往視之乃有橫石隱然在水中因奏開鑿竟去其石民今賴之

北夢瑣言

瀾洲石室

瀾洲有石室其東一石如鼓形又有榴木杖倚石壁採

珠者必致祭

交州記

龍村

合浦有人得夜光珠吞之遂不食數數喜入水未幾生

鱗鬣化龍而去今龍村是也

合浦志

雷州府

雷神

雷神廟在英榜山廟貌尊嚴相傳陳時雷州人有陳鉞者無子業捕獵家有九耳犬甚靈凡將獵卜諸犬耳一

耳動則獲一獸動多則三四獸少則一二獸一日出獵而九耳俱動鉗大喜以為必多得獸矣既之野有叢棘一區九耳犬圍繞不去異之得一巨卵徑尺攜以歸雷雨暴作卵開乃一男子其手有文左曰雷右曰州有神人嘗入室中乳哺鄉人以為雷種也神之太建三年果為雷州刺史名曰文玉既沒神化大顯民因祀焉

參補

海神

海神甚靈明嘉靖間有渡瓊者見海神卓立水面高丈

餘朱髮長髯冠劍偉麗衆驚伏下拜海神徐掠舟而過
有光景經久不滅次日有三舟復見大譟拒之風波盪
湧舟盡覆海濱父老云凡渡海每月十八日勿渡渡則
撓神之怒若至海安所聞濤聲哮吼大地震動則知三
四日內必有大風雨不可渡也

叅補

祈雨樹

海康縣之討網村前海嶼三壑上有古樹槎枒甚怪號
龍王有井味淡號龍泉天旱酌井中水樹下祭之則雨

海康
志

陷湖

陷湖在遂溪縣東南七十里周圍十餘里其泉極清故
老傳云古系托甯二村唐時有一白牛入于本村村人
共殺食之惟一老嫗不食一日天降大雨二村俱陷老
嫗攜一傘竹杖乘雨而走回望地陷不已遂以傘竹插
地陷乃止二村人民無一存者其後傘竹倒生湖傍因
名陷湖即今之湖光巖是也

府志

呪肉

雷州奏牘有人為巫詛死問其狀巫以熟牛羊肉呪之須臾為生肉又呪之須臾復活牛仍為牛羊仍為羊但渺小耳又呪之須臾復為生肉又呪之須臾復熟人食之腹中淫淫動隨裂而死乃逮巫磔之

筆談

金牛庵

唐開元中見一牛色如黃金與常牛大異眾逐急牛跑而没于土掘六尺餘止見尾五寸許村人砍取之乃金

也因是創庵穴上名金牛庵凡風雨夜牛常出庵外踏

印於地

府志

伏波例封

府城南三里祀兩伏波將軍前伏波路博德後伏波馬援凡濟海者必卜焉蘇軾有記宋元豐五年封忠顯王誥曰明神在於天幽功施于世從而修報古之道也靈貺所及屢獲嘉應宜賜爵號以答神休宜特加封忠顯王宣和二年封誥曰雷州忠顯王昔以智謀終殄金溪

之寇已而精爽常為月窟之遊既憑物以顯靈況有功而當祀嶠南萬里遺愛猶存廟食千年英風尚凜頃緣使舶共苦風濤漕臣修致禱之虔以求共濟屏翳息號空之怒飄順而安遂成濟海之功無媿伏波之號宜進加於徽號用昭報於寵休神其格思歆我嘉命可特封忠顯佑順王兩神同一誥蓋例封也

府志

木佛

第六都香坑村昔年水漂一木於香坑溪逆流而上落

於田中鄉人棄去復反者數四因異之刻為九座木佛
旱澇禱之應如影響至今其佛猶存

府志

石牛

遂溪縣第三都英靈下村昔有土地堂陳時有客驅牛
至堂前悉化為石石皆半牛頭形容因家於此即雷種
之祖地也後人因其石如牛形故立為石牛廟

府志

龍爬石

舊縣東五里峯崙埠有石枕於海岸長五尺闊三尺宋

嘉定九年天雷大雨龍降其地爪痕在石如鑿有泉水

在石湧出旋為潭鄉人凡遇亢旱於此祈禱雨澤焉

府志

石馬井

徐聞縣東五里有馬盜食田禾人逐之入井因垂絙而

下得石馬

府志

瓊州府

毘邪

瓊臨高縣西十里有毘邪山建武二年村民王氏者二

人長曰祈次曰律與鄉人王居傑獵於山憇石上祈為石所吞啗居傑三引刀不解祈被吞未盡間忽作聲曰我為毘邪天神隱此石室已後可以純白三牲一祀我言訖遂寢入石中不復見宋靖康間賊王文滿煽亂率衆環攻臨高民受荼毒無能禦者吏民乃禱之於毘邪神須臾蜂蠆彌空肆毒行螫羣盜奔潰民賴以安蓋神其祐也

地理志

黎母

黎母山之巔雖生黎亦不能至相傳其上有人壽考逸樂不與世接虎豹守險無路可攀但覺水泉甘美絕異

爾

桂海虞衡志

勞將軍

勞將軍廟去城東隅六十里許祀屋久廢隙地在焉凡官莅任必先此設祭祀典不載其名爵父老相傳云此神乃伏波部下先鋒將方凱旋時牽馬飲於河馬忽覩水中影雙蹄奮起傷勞而死遂為神

海槎餘錄

木飲

朱崖境內有一島居民甚衆地無井泉海水特鹹取草

木汁飲之故號木飲州

酉陽雜俎

徐庶飛昇

康熙三十五年廣東五指山白日雲鶴翔空香霧繚繞
有一仙人升舉空中語山中人曰我三國時徐庶也修
煉千餘年今得冲舉汝輩可傳與世人知之

述異記

雞窠小兒

宋李守忠太平興國中為承旨奉使過海至瓊逢一翁
自稱楊遐舉年八十一邀見其父叔連年一百二十二
祖宋卿年一百九十五梁上雞窠中小兒出頭下視宋
卿曰此乃前代祖也不語不食不知其年朔望子孫列
拜而已

洞微志

梁飛

唐貞觀初析崖州地置瓊州於麻釵都大江之濱城垣
基址俱具解守初暨一夕梁飛忽失所在覓得之於今

城因定州治

府志

鯉魚潭

鯉魚潭在澄邁縣南三十里林表村深碧中有異魚如鯉身首稍圓不下千百數以飯投之始則如掌大者羣食再投則盈尺或二三尺者出食人不敢取水雖漫魚不離所間有隨水出者人獲而剖之血流滿地烹之成水禱雨隨應上有聖母祠

府志

李德裕後

李贊皇之南遷也卒於崖州子孫遂為獠族數百人自相婚配明正德間吳人顧朝楚為儋州同知以事至崖召見其族狀與苗獠無異耳綴銀環索垂至地言語亦不相通德裕誥勅尚存

尚谿
織志

衣冠勝事

廣於天下為遠藩仕籍華秩已少况瓊於廣又為遠郡明成化二年秋進薛遠為戶部尚書邢宥為都御史丘濬為翰林學士皆在一月海外衣冠勝事真竒逢也

府志

金節婦

節婦姓耿氏歸金用和未三閱月用和以事渡河暴風
卒起同舟皆溺報者謂已死節婦亟入室以首飾服器
管鑰之類盡付夫妹閉門自縊已而夫歸而節婦氣絕
適名醫徐公美聞哭聲入視之心尚微溫依法救之良
久始甦間與用和談論古今援引皆有証據用和或不
知也及用和罹奇禍節婦避難於民間為民所得將昇
入城節婦曰昔王凝之妻為逆旅主人所持即斷其臂

而吾以目視惡人可乎不如死之為愈也即瞑目不食者數日民懼乃舁還其家氣已垂絕矣開目謂夫妹曰吾死分矣汝可語汝兄善視兒女言罷而卒

瓊臺類稿

羅定州

趙佗像

州西五里名牛頭灣有古廟壑漢趙佗像祀之明萬厯五年夜大風雨像忽飛去至玉樹岡止焉鄉民遂飭神宇祈禱其舊鍾及爐未飛至者數請入新廟輒又飛去

竟不可留

州志

連州

聖鼓枝

涇水東南入陽山縣東岸有聖鼓枝即陽山之鼓枝也
橫在川側雖衝波水激未嘗移動百鳥翔鳴莫敢萃者
船人上下以篙撞者輒有異驗

水經注

按聖鼓枝荊州記名為聖木秦時伐此木為鼓額至
今猶存根株在縣西北石塘村岸旁

廣東通志卷六十四